

CONVENIO DE COLABORACIÓN ENTRE A AXENCIA GALEGA DE INNOVACIÓN E A SOCIEDADE PARA A PROMOCIÓN DE INICIATIVAS EMPRESARIAIS INNOVADORAS, S.L PARA O COFINANCIAMENTO DO PROXECTO BIOINCUBATECH, INCUBADORA DE ALTA TECNOLOXÍA PARA O FOMENTO DA INNOVACIÓN E TRANSFERENCIA DE BIOTECNOLOXÍA NOS ÁMBITOS DA SAÚDE E AS TECNOLOXÍAS ALIMENTARIAS ÁS MICROPEMES

MEMORIA XUSTIFICATIVA

Patricia Argerey Vilar, directora da Axencia Galega de Innovación, da Consellería de Economía, Emprego e Industria, **DECLARO:**

1. Que a Axencia Galega de Innovación (en adiante, GAIN) formalizou coa Sociedade para a Promoción de Iniciativas Empresariais Innovadoras, SL (en adiante, Uninova) o instrumento convencional arriba referido por un período de vixencia que abrangue dende a data de sinatura do convenio de colaboración ata o 31.12.2021.
2. Que o instrumento convencional ten por obxecto establecer o marco de colaboración entre a GAIN e Uninova, para o desenvolvemento do proxecto “*BioIncubaTech, Incubadora de Alta Tecnoloxía para o fomento da innovación e transferencia de biotecnoloxía nos ámbitos da saúde e as tecnoloxías alimentarias ás micropemes*”, concedido no marco da convocatoria da Fundación Incyde para o desenvolvemento do proxecto "Incubadoras de alta tecnoloxía para o fomento da innovación e a transferencia da tecnoloxía ás micropemes" (Nº Expediente: IAT1805) cofinanciado polo Programa Operativo Plurirregional de España FEDER 2014-2020.
3. Que o instrumento convencional que se pretende asinar se fundamenta no seguinte:
 - A Lei 5/2013, do 30 de maio, de fomento da investigación e da innovación de Galicia establece o marco para o fomento da investigación e do desenvolvemento tecnolóxico, da transferencia e valorización de resultados e da innovación en Galicia en todas as súas vertentes, así como da súa xestión eficiente. Esta lei ten como obxectivo coordinar e potenciar os esforzos destinados a promover o coñecemento científico, contribuír eficazmente á consolidación da posición das empresas e institucións galegas no ámbito competitivo europeo e internacional e posibilitar un cambio no modelo produtivo galego cara outro centrado na innovación.
 - GAIN é unha axencia pública autonómica encadrada nas entidades instrumentais do sector público autonómico reguladas no título III da Lei 16/2010 do 17 de decembro, de organización e funcionamento da Administración xeral do sector público autonómico, tal e como se recolle no Decreto 50/2012, do 12 de xaneiro, polo que se crea a Axencia Galega de Innovación e apróbanse os seus estatutos (modificado polo Decreto 15/2014, do 6 de febreiro). Atópase adscrita á Consellería de Economía, Emprego e Industria e conta con personalidade xurídica propia diferenciada respecto da Administración xeral da Comunidade Autónoma de Galicia, patrimonio e tesourería propios e autonomía de xestión nos termos que precisen as leis.



- GAIN ten como finalidade fomentar e vertebrar as políticas de innovación nas administracións públicas galegas e o apoio e impulso do crecemento e da competitividade das empresas de Galicia, a través da implementación de estratexias e programas de innovación eficientes. Os seus estatutos atribúenlle, entre outras, as seguintes funcións: a ordenación, planificación, coordinación, execución e seguimento das competencias en materia de fomento da investigación que ten atribuídas a Comunidade Autónoma de Galicia en virtude do establecido no artigo 27.19º do Estatuto de autonomía de Galicia e a promoción, xestión e execución do Plan Galego de Investigación, Desenvolvemento e Innovación Tecnolóxico, asumindo a súa coordinación, seguimento e avaliación.
- A Estratexia de Especialización Intelixente de Galicia 2014-2020 (RIS3 de Galicia) constitúe o principal marco instrumental para articular e reforzar a política de I+D+i galega de cara consecución dos obxectivos establecidos no horizonte do 2020. A RIS3 de Galicia busca, de forma coordinada co conxunto de estratexias de ámbito rexional, nacional e europeo, e no marco de financiamento comunitario ata 2020, maximizar, a través da Innovación, o aproveitamento das oportunidades que entraña o contexto de transformacións globais que estamos a vivir e alcanzar os obxectivos de modernización da economía, competitividade e progreso social asumidos no Plan Estratéxico de Galicia 2015-2020.
- Por outra banda, a Estratexia de Impulso á Biotecnoloxía de Galicia 2016-2020, dentro dos seus eixos estratéxicos concretamente no seu Eixo A. Investigación, Transferencia de tecnoloxía e creación de empresas, integra un programa de actuación, o A.2. Programa de fomento bioempresedor e bioaceleración, no cal contempla unha acción específica relativa a programas de aceleración de proxectos biotecnolóxicos e Fomento da participación e atracción de iniciativas Open Innovation.
- O artigo 4 dos Estatutos de Uninova, establece que, “(...) a Sociedade poderá realizar as seguintes actividades: Apoio á creación, formación e desenvolvemento de empresas; Contribución e colaboración no reciclaxe, actualización e especialización profesional de posgraduados, cara a súa integración nunha organización empresarial; Apoio á formación de empresarios; Formación especializada en actividades de desenvolvemento tecnolóxico; Organización de xornadas de estudo, orientación e outros cursos relacionados cos obxectivos xerais da Sociedade; Constitución dun centro de apoio e referencia na Comunidade Galega en materia de creación de empresas en base a criterios de innovación tecnolóxica; Prestación de servizos e asistencia técnica a empresas innovadoras; Calquera outras que afecten ou incidan en calquera forma ou ámbito, nos intereses xerais ou peculiares, efectivos ou expectantes da Sociedade ou de calquera socios que a integran”.
- Uninova constituída baixo a forma xurídica mercantil de sociedade limitada, e participada polo Concello de Santiago (49%) e a Universidade de Santiago de Compostela (51%), ten a consideración de Sector Público en base ao artigo 2 da Lei 40/2015 de Réxime Xurídico do sector público, ao artigo 3 da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia e ao artigo 2 da Lei 8/2015, de 7 de agosto, de reforma da Lei 6/1985, de 24 de xuño, do Consello de Contas, e do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, de 7 de outubro, para a prevención da corrupción.



- Uninova é unha entidade que forma parte do sector público constituída coa finalidade de potenciar o desenvolvemento de iniciativas empresariais partindo da investigación e do desenvolvemento tecnolóxico da USC, para contribuír á consolidación na cidade de Compostela dun tecido produtivo e de servizos avanzados con claro matiz innovador.
- A Fundación INCYDE foi nomeada Organismo con Senda Financeira segundo carta da *Dirección General de Fondos Europeos* do *Ministerio de Hacienda*, de data 23 de xuño de 2016, e segundo Convenio Marco de Colaboración asinado entre a Cámara de Comercio de España (Organismo Intermedio do PO), e a Fundación INCYDE, de data 2 de outubro de 2017, para o desenvolvemento do Proxecto Incubadoras de Alta Tecnoloxía para o fomento da innovación e a transferencia da tecnoloxía ás micropemes.
- A Universidade de Santiago de Compostela, Uninova, e a *Cámara de Comercio, Industria, Servizos e Navegación de Santiago de Compostela* decidiron presentar unha candidatura ao Proxecto Incubadoras de Alta Tecnoloxía denominado *BioIncubaTech. Incubadora de Alta Tecnoloxía para o fomento da innovación e transferencia de biotecnoloxía no ámbito da saúde e as tecnoloxías alimentarias ás micropemes* (en adiante, **BioIncubaTech**). Dita candidatura contou coa colaboración e compromiso de cofinanciamento da GAIN; que ademais se compromete a “participar activamente na definición, execución e supervisión da dirección estratéxica e de xestión de BioIncubaTech de xeito que as actividades desenvolvidas durante o proxecto financiado, e posteriormente de selo caso, estean coordinadas coas políticas públicas de transferencia e encaixen tanto na RIST3 como na Estratexia de Impulso da Biotecnoloxía en Galicia 2016-20”. Estes compromisos quedaron reflectidos no “Pre-Acuerdo” asinado por GAIN o 20 de febreiro de 2018 que se inclúe como anexo II ao presente Convenio.
- Tal e como se describe nos Criterios de Selección de Operacións do PO Plurirregional de España FEDER 2014-2020, a Fundación INCYDE procedeu á designación dos Organismos Beneficiarios executores do proxecto a través dun procedemento de concorrència competitiva de acordo cos principios de publicidade, transparencia, obxectividade, igualdade e non discriminación, así como cos principios de eficacia e eficiencia na xestión. Así, tras o desenvolvemento do procedemento, resultou seleccionada, por resolución definitiva publicada no BOE do 16 de maio de 2018, a candidatura *BioIncubaTech. Incubadora de Alta Tecnoloxía para o fomento da innovación e transferencia de biotecnoloxía na o ámbito da saúde e as tecnoloxías alimentarias ás micropemes*, integrada pola Universidade de Santiago de Compostela, a Sociedade para a Promoción de Iniciativas Empresariais Innovadoras, SL e a Cámara de Comercio, Industria, Servizos e Navegación de Santiago de Compostela. Cada un deles resultou seleccionado como Organismo Beneficiario dunha operación concreta a executar no proxecto.

Distribución do orzamento total do proxecto por entidade beneficiaria e entidade financiadora				
	USC	Cámara Santiago	Uninova	Total
INCYDE	1.262.007,02 €	75.306,66 €	150.613,34 €	1.487.927,02 €
GAIN	315.501,76 €	18.826,67 €	37.653,33 €	371.981,76 €
TOTAL	1.577.508,78 €	94.133,33 €	188.266,67 €	1.859.908,78



- En virtude do anterior, con data 13 de xullo de 2018 subscribiuse o Convenio de Colaboración e Documento que Establece as Condicións da Axuda (DECA) para a *Incubadora de Alta Tecnoloxía para o Fomento da Transferencia de Tecnoloxía ás MicroPEMES **BioIncubaTech***, que se inclúe como anexo III ao presente Convenio.
- En cumprimento do establecido no artigo 15.2 da Lei 1/2016, de 18 de xaneiro, de transparencia e boas prácticas na Administración Pública Galega, nos artigos 19 e 26 da Lei 9/2007, de 13 de xuño, de subvencións de Galicia e no artigo 40 do Decreto 11/2009, do 8 de xaneiro, polo que se aproba o Regulamento da citada Lei, os obxectivos que se perseguen con este convenio resultan de interese xeral, xa que coa posta en marcha deste proxecto promoverase a creación dunha contorna de alta innovación que transfira ao mercado o coñecemento xerado en centros de investigación, departamentos de I+D+i empresarial xerando sinerxías entre empresas tractoras, pemes e micropemes, así como unha contorna idónea garante do éxito dos proxectos innovadores, altamente tecnolóxicos incubados na mesma.
- Así mesmo, dada a especificidade do obxecto do convenio, de apoio ao proxecto **Bioincubatech**, que foi seleccionado pola Fundación Incyde para ser cofinanciado con fondos FEDER (Programa Operativo Plurirrexional de España FEDER 2014-2020 PO) no marco do Proxecto Incubadoras de Alta Tecnoloxía para o fomento da innovación e a transferencia da tecnoloxía ás micropemes, non procede a realización dunha convocatoria pública para o desenvolvemento das actuacións do mesmo.

4. Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, ou doutro instrumento alleo á natureza estritamente convencional.

5. As actividades obxecto do convenio contan cun orzamento total de 188.266,67 € para o período 2018-2021 dos que a Fundación INCYDE financiará o 80% e GAIN o 20% con cargo á aplicación orzamentaria **09.A3.561A.744.0** (Cod. Prox 2019.01) dos orzamentos da Comunidade Autónoma de Galicia para os anos 2019, 2020 e 2021, segundo as anualidades e importes máximos seguintes:

Orzamento anualizado Bioincubatech_Uninova				
Ano	2019	2020	2021	Total
Orzamento a executar Uninova	30.000,00 €	71.853,34 €	86.413,33 €	188.266,67 €
Financiamento INCYDE (80%)	24.000,00 €	57.482,67 €	69.130,67 €	150.613,34 €
Financiamento GAIN (20%)	6.000,00 €	14.370,67 €	17.282,66 €	37.653,33 €



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asino esta memoria, en Santiago de Compostela,

A directora da Axencia Galega de Innovación

Patricia Argerey Vilar

